

Vun driveriver

erscheint auf www.lenauheim.de

monatliche
Erscheinung

Dezember 2020

von Helen Alba

Mit de Kerze um die Wett geleicht

Es war e Winterszeit, so wie im Märchen. Sametblooer Himmel mit blinkende Sterne, Bääm, die e dicke Schneelascht getraa han, die Gärten un Gasse ware weiß un die Dächer vun de kleene Heiser han grad so ausgschaut, als ob se Heibchen vun alte Weiwer traan meechte. Mir han weit zu gehn ghat, bis zur Kerch. Die Mutter hat uns warmi Pellkartoffel in die Säck gstoppt, so han mer unser Händ warmhülle kenne. Weil, e schmaler Wech hat dorch de Wald gfiehr. De Schnee hat wie dicki Watta uf de runerghongeni Fichtenodde gelee. Es war e bezauberndes Bild. Die Lichtkreisle vun unsre Sturmlaterne han wie riesengroßi Talre uf em Wech gelee. Mei greeßere Bruder hat die Latern getraa un ich sin mit meine klenre Gschwister hinerher vun ihm un der Mutter getrippelt. Mir ware unser siewe Gschwister. De Vater war irgendwu im Erschte Weltkriech. Ufeemol heert mer Glockegeleit dorch die Nachtstille. Die Erinnerung dran, verschlaiert noch heit mei Blick.

Es Lewe un die Zeit is weitergerollt. Es hat in der Zwischenzeit vun meim Lewe nochmol e große Kriech gin, der unermessliches Leed iwer die Welt un aach iwer mei Familie gebrung hat. Ich schau uf e langes Lewe vun 84 Jahr zuruck. Die Zeit heelt Wunde, awer e Vergesse git es nie. Jetz sin ich schun Urgroßmutter. Die liewe Kleene mache mer viel Freed un es Lewe is for mich noch immer wertvoll. Weil aach heitzutach leichte die Kinteraue uf, in der Weihnachtszeit. Jetzer sin ich weit wech vun meiner liewi Heimat, wu die Sterne vill heller am dunkle Nachthimmel blinke. Ich sin mit meiner Tochter un ihrer Familie in Deitschland. Die erschte Weihnachte in der Fremd! Die Enkelskinner sin uf Bsuch kumm. Am dritte Adventssunnach han ich die Urenkelcher an der Hand angepackt un sin mit ne dorch die hellerleichtete Gasse spaziert. Aus manchem Raachfang is Raach rausgequalmt. Fallendi Schneeflocke han unser Wech geziert, in de Schaufenschtre war Lichterglanz zu gsiehn. Dort hat allerlei Lebkuche, Marzipan gelee, e Phefferkuchehaus un rotbackichi Weihnachtsäppl ware zu gsiehn - derzwische vieli, vieli Spielsache. Des war alles aach for mei Aue wie e Märchen. Vieli Mensche husche dorch die traamhafti Dämmerung. Vielleicht wille se noch ihre letshti Einkäufe mache? Alles war unwahrscheinlich scheen. Uf unsrem Spaziergang dorch de winterliche Owet sin mer aach an eener Kerch langschtgang. Mer hat die Glocke dorch die Abendstille leite gheert. In der Kerch is e Krippenspiel ufgfiehrt gin. Uf eemol han mer Orgelmusich gheert - "O, du fröhliche, o, du selige Weihnachtszeit!" Mir sin in die hell erleichti Kerch ningangng. Wie han do die Kinteraue mit de angebrennte Kerze um die Wett geleicht?! - Genauso wars aach domols, wie ich kleen war un vum Krischkindl in der Kripp geträmt han.

Verzählt vun der Bäsl Krischtin, ufgschrieb vun Helen Alba